

Hormat undang-undang negara - Ismail Sabri
Astro Awani
03 Mei 2020
Fauzi Suhaimi,

PUTRAJAYA: Langkah kerajaan melakukan operasi tangkapan pendatang tanpa izin di kawasan Perintah Kawalan Pergerakan Diperketatkan (PKPD) adalah berdasarkan undang-undang sedia ada dan demi melindungi kepentingan negara.

Menteri Kanan (Kluster Keselamatan), Datuk Seri Ismail Sabri Yaakob menegaskan, perkara itu dilakukan berdasarkan undang-undang yang ada di negara ini.

Tegas beliau, Malaysia sebagai sebuah negara berdaulat mempunyai kuasa untuk melaksanakan tindakan tersebut dan semua pihak harus menghormati undang-undang negara ini.

"Keputusan menjaga kepentingan negara kita adalah hak kita dan kita laksanakan ini berdasarkan undang-undang yang ada," katanya dalam sidang media harian pada Ahad.

Mengulas lanjut, Ismail Sabri berkata, semua pendatang tanpa izin yang ditahan dari kawasan PKPD diwajibkan menjalani saringan COVID-19 sebelum dihantar ke depoh tahanan.

"Mereka yang dari kawasan PKPD menjalani 'swab test' dan yang di kawasan Masjid India (Kuala Lumpur), saya difahamkan (mereka menjalani) tiga kali (ujian swab).

"Keputusan meletakkan pendatang tanpa izin di depoh Imigresen juga adalah bagi memastikan mereka tidak bergerak bebas setelah PKPD di satu-satu kawasan ditamatkan.

"Selepas tamat PKPD, ke mana mereka hendak pergi? Adakah sesiapa yang masuk ke negara kita, kita benarkan sahaja mereka bebas bergerak walaupun mereka tiada dokumen perjalanan sekalipun? " soalnya.

Sebelum ini, Amnesty International mempersoalkan tindakan pihak berkuasa menahan pendatang tanpa izin di kawasan PKPD dan mendakwa keputusan meletakkan mereka di depoh tahanan Imigresen meningkatkan risiko mereka mendapat jangkitan COVID-19.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/hormat-undang-undang-negara-ismail-sabri-241307>